



# LA PATRIE DAL FRIÛL

SFUEI MENSÎL INDIPENDENT

Direzion e Aministrazion - Udine - via del Cottonificio 129

Tassa pagata / Taxe perçue Udine Italy - mensile / mensil spediçion in abonament postâl Poste italiane s.p.a.

## LINT AUTONOMISTE



### La braùre di jessi diferents e originâi

Dree Valcic

\*\* No volarès someâ blasfem se o olsi citâ une frase gjavade dai Vanzelis di Mateu e Luche par introduci cheste mè riflession: "Il racolt al è tant, ma i operaris a son pôcs". La parabule di Jesù e fâs riferiment a un mont pront a dà acet ae sò Peraule, ma al vise i dissepui che, par meti in vore cheste mission, a coventin oms e feminis che si impegnin a pandile.

\*\* Mi pâr un invît che si adate ae situazion atuâl dal popul furlan, in crisi di identitât e che al cîr, juste apont, une peraule di sperance, di chel che Pasolini al clamave "Il sogno di una cosa".

\*\* Un popul furlan confusionât e vitime sacrificâl di une campagne di delegitimazion indurante e pesante, cu la sò storie e i siei valôrs ignorâts, se no cjołts vie, ma ancjetant in ecuilibri instabil tra une omologazion gjeneraliste e la acuse di jessi prede di visions arcaichis, fûr de modernitât: "reazionaris e conservadôrs".

\*\* Concets tant che "Salt, onest e lavoradôr" vuê a son metûts a ridicul, cuntune classe politiche locâl che dispès ju disonore, dant flât a chei che a contestin la lôr validitât.

\*\* "Friûl gno, là sêstu finît?" al berle cualchi erêt vaiulint di chel pessimisim che i steve tant a cûr a pre Turolde. E jù cu lis lagrimonis pal passât contadin, e pe vergjinitât pierdude di une tiere felice.

\*\* Facil, ma ançe vergognôs. Alibi par lâ indenant a no fâ nuie par dâi cuintri ae situazion atuâl e restâ sentâts comuts intal tinel tal gnûf rûl di "leons di (al va indenant a pagj. 2) ►



## EDITORIÂL

### LA LEZION DE EUROPEADA: CRODI TES LIDRÎS E JE UNE SIELTE VINCENTE

Walter Tomada

Cumò o vin la dimostrazion: cuant che i furlans si metin a lavorâ cun braùre e serietât a di un progjet che al à la sò fonde tai valôrs de identitât, il sucès nol scjampe. La scuadre di balon dal Friûl, che ae prime partecipazion e devente campione des minorancis dal continent, e fâs de nestre tiere un model di cemût che i popui cence Stât di dute la Europe a varessin di peâsi aes lôr lidrîs. In grazie dal "mister" Mauro Lizzi e dal president Daniele Puntel, che al à lotât tant che un leon par rivâ adore a meti in vore un progjet di cheste fate, il non dal Friûl al reste marcât fra chei che a contin inte "galassie" des nazions "che a àn une bandiere, ma no un esercit", come che lis clamave Sergio Salvi. ♦ Di cheste bieles storie o fevelin intun speciâl di dôs pagjinis, ma no je la uniche bieles gnove di chestis setemanis. Di fat a son pardabon tancj, cuaranteun, i sindics di gnove nomine che,

dopo des ultimis elezions, a àn decidût di fâ il lôr zurament ançe in lenghe furlane. Tal 2020 o fevelavin dome di cuarantene, cumò par fortune e je cheste... cuarantene che nus pâr une buine vaccine par sledrosâ il prejudizi che tancj furlans a van indenant a vè cuintri de lôr lenghe e de lôr identitât. Chesçj sindics, nol

impuarte di ce partît (talian, parcè che, magari cussì no, di autonomisçj no 'nt son ni tancj ni pôcs), a àn mostrât di tignî cont de sensibilitât dai citadins e de dignitât de lôr lenghe. E nol è dome un at formâl, ma une responsabilitât pal avignî. Aministrâ e je une azion che si scuen fâ cun rispiet, e sielzi di

partî cul rispiet pes modalitâts di espression de comunitât che si va a vuiddâ, al è un at di civiltât. ♦ Dongje di chestis bielis storiis, a 'nd è une altre che nus à simpri jemplât il cûr di amirazion e che no à vût un biel finâl. Nus à di fat lassâts masse adore, a 44 agns, Gianna Saccomano, une fantate furlane fuarte che te sò vite e je stade pardabon un esempli. Ancje se no viodeve, e à fat di dut par jessi indipendente cul so lavôr (in Regjon) e cu la sò espression creative. E veve slargjate cussì tant la sò sensibilitât viers la musiche e la culture diventant un riferiment dal Vididue Project, une formazion che e torne a fâ vivi i sunôrs furlans tradizionâi cu la atmosfere de Ete di Mieç. E jere "la autonomie" in persone, ma un brut mâl di chei che no perdonin al à puartade vie la sò presince fisiche, ma no la memorie de sò fuarce e libertât. Gianna, i furlans che no si rindin ti ringraciïn e no ti dismentein. ■

❖ a pagjine 3

#### MESTRIS

Intervistis a personaçs de culture furlane su chei che a son stâts i lôr riferiments di Dree Venier

❖ a pagjine 5 e 12

#### VIZIS E VIRTÛTS E CJARGNELAS

Dôs gnovis rubrichis par cure di Diego Navarria e Agnul Floramo

❖ a pagjine 7

#### IL LUNARI DI AVOST

La cusine, i Sants, la fieste, i proverbis, i lavôrs de tiere... par cure di Mario Martinis

❖ a pagjine 11

#### IL LÂT DI CJAVAÇ

Un sît impuartant e pôc considerât pe biodiversitât di Gianluca Rassati



## LINT AUTONOMISTE

(al va indenant de prime pagjine)

## La braùre di jessi diferents e originâi

Dree Valcic

tastiere", di bastiancontraris, di Cassandris, cjapantse cun dut e cun ducj, soredut cun chei che, invece, no molin di impegnâsi pe cause identitarie.

\*\*\* Fûr, tal mont reâl, tancj furlans e furlanis a spietin che cualchidun si fidi di lôr, che al crodi che al sedi ancjemò pussibil discuvierzi la braùre de lôr diversitât originâl.

\*\*\* Gnûfs operaris si cjapin la responsabilîtât di agjî par saborâ cheste cussience identitarie. L'esempli plui biel al rive de Nazionâl di balon furlane a pene nassude, e de sò partecipazion ae edizion de Europeada. No dome pe vitorie finâl magnifiche, ma par vê crodût che al fos pussibil fâ diventâ realtât une sperance che nô ducj o vin vût di piçui insù. La nestre nazionâl. E par une robe di pôc e al è invece un avigniment straordenari, nassût dal bas, bon di butâ in bande ogni ostacul che al rivave par intrigâ su la sò strade. Il so principâl protagonist, Daniele Puntel, al à declarât: "L'avigniment sportîf de iniziative al à permetût di saborâ une comunicazion buine di difondi la identitât furlane, identitât che si voleve dimostrâ e che o pensi che si sedi concretizade cun cheste squadre".

\*\*\* In fonts, cence discomodâ il Vanzeli, ancje chest al è un at di fede. ■

## INT DI CJARGNE

## "Chei di Muine" che a tegin vîf il paîs dant acet ai turiscj

Marta Vezzi



"La cooperative e je nassude tal 1927 tant che circol ricreatif. - Al conte il president e rapresentant legâl de cooperative Italo Stefani - Tal '48 e je diventade Cooperative di Consum cun finalitât mutualistiche e e je stade vierte la buteghe di alimentârs e la ostarie. Cul timp la buteghe e à vût di sierâ stant che no veve plui zîr par vie de concorenza des grandis buteghis, e al è restât viert dome il barut."

La strutture di chest edifici e je grandone e je stade fate de int dal paîs e dai socis de cooperative. Si scuèn di che vuê la sò gjestion e dificle se no altri pal mantigniment e lis tantis spesis fisis di sostignî ogni an. "O vin dât in afît la ostarie, e l'apartment che al jere nassût come ricet pai dipendents de ostarie e de buteghe lu vin furnît e vuê al è diventât il "B&B Il Riçûl": une maniere par recuperâ e mantignî a nivel finanziari ce che al è stât fat dai vecjos."

◆ Un timp dute la int dal paîs si asociave, e, a man a man che cualchi soci al murive, la famee e decideve se tignî ative la adesion proponint un altri component de famee o lassâ pierdi. Tal timp il numar dai socis al è calât. Vuê a Muine a vivin 117 personis e i socis de Cooperative a son 66. "Cul passaç des liris al euro - al marche il president - e je stade fate une bieles tamesade di socis. La cuote prin e jere di 10 mil liris. Cuant che i conseîrs a à decidût di passâ dentri di une altre cooperative plui grande, la cuote e je passade a 25 euros. Cualchidun al à acetât e altris a à molât.

La ostarie e je un lûc fundamentâl par cjatâsi e se e ves di sierâ, il paîs al murirès. E je sierade dome il lunis, e il martars e je vierte fin a misdi. In chesj dîs e je vierte

des 10.00 aes 14.00 e di sere des 16.30 indenant fin cuant che al è cualchidun. Dispès cui zovins o organizin fiestis par creâ un pôc di plui moviment e duncje staronzâ lis jentradis.

◆ Di bon che di un pôc di timp tra i socis o vin ancje la Associazion "Chei da Muina" che nus da une grande man. Cul fitâ lis cjamaris o vin aderît a Booking.com par cirî di jessi agjevolâts e cognossûts. E cussî o vin vût a fânus visite polacs, slovacs, rumens; i unics dal Stât talian a jerin di Bressanon, se di no... ducj forescj.

◆ Nol è tant che si sin associâts ae Confcooperative Alpe Adria par podê vè un supuart impuartant: nus curin l'aspîet burocratic comercialiscj e consulents, e par cualsisedi ativitât si poîn su lôr. Gracie a cheste adesion, cirche un mès indaûr o vin vût in visite une zovine laureade argentine cun lidris di Glemone che e à curât il progjet publicitari dal B&B (comissionât de Confcooperative Alpe Adria). E cussî par 15 dîs e à vivût a Muine e e à zirât dute la zone par cognossi ben il puest, cun chê di ocupâsi de publicitât de nestre realtât su FB e Instagram. Ogni setemane e vignarà metode cheste publicitât su lis rêts sociâls.

◆ Al è impegnatîf stâ daûr a dut; - al siere Italo - la ativitât e je partide intai agns de miserie e cumò che o sin te bondance o stentin a mantignî impins dut, ma o cirin di tignî dîr. La femine che e gjestis la ostarie e stente a rivâ ae fin dal mès e forsî cuant che e je cualchi fieste e rive a incassâ alc di plui, se di no e devente une mission plui che un lavôr, cun chei cuatri che ogni dì a van a bevi alc. E je une mission cetant impuarte. Se e ves di mancjâ chest pont di riferiment, al sarès pardabon grâf. Nus tocje tignî dîr." ■

## ART TAL TAC

## "Memorabilia": Louis Armato e un progjet che al conte la musiche di une gjenerazion interie

*Cjançons ineditis, demos, esibizioni live, versioni alternativis e tant altri materiâl che si lu cjate da râr sul web o su lis platformis digjitâls*

Maira Pezzetta



Une iniziative cuintri corint, parcè che si à miôr il contat diret e personâl invece che la condivizion generalizade che si sin usâts midiant dai social media.

◆ Il cjantautôr glemonès Louis Armato sal impensin ben tant che leader storic de band punk rock "Mercenary God", tai agns subit dopo il taramot dal '76, e pai siei tancj lavôrs cun diversis formazions come "Carillon!", "Cleverness", "Rejoice", "Bad Memory", "Angelica Lubian band", "Louis Armato band", "Acoustic Songbook duo" e tancj altris.

◆ Tai agns al è ancje stât responsabil dal sît [www.rocknotes.it](http://www.rocknotes.it) e al a condusût la trasmissione radiofoniche Rocknotes.it su Radio Onde Furlane e scrit articui su lis propuestis artistichis furlanis tes pagjinis di Il Friuli.

Cu la etichete discografiche AUA Records al a publicât divers albums che, tacant di "Blang!" dal 2011 e passant aes compilations dal "Circolo Acustico", a tegin dongje ducj i tocs in studi, ma ancje chei acustics e dal vîf scrits dal 1981 indenant.

◆ Armato, oltri a ducj i concerti e progjets che al organize, al è ancje impegnât te scuele *Gemusica* di Glemone, come insegnant di ghitare. Tal 2022, pal centenari dedicât a Pier Paolo Pasolini, adun cul so grup storic "Mercenary God" al à registrât un gnûf toc punk cul titul "Hey Boy" pal progjet PPP "I Punks Tal Friûl". (Lait a lei il toc che o vin dedicât al teme: <https://www.lapatriedalfriul.org/i-punks-tal-friul-e-la-voie-di-fa-rumor-in-non-di-p-p-p-punk-punksolini/>).

L'artist nol piert ocasion par realizâ gnûfs progjets e incentivâ chei mancul gnûfs che a tegin dongje tancj artiscj de sene musicâl furlane come il "Circolo acustico", che al è stât il so ideadôr. Al colabore cun tancj musiciscj furlans e forescj, ancje di gjenars divers, e in ogni sò esibizion dal vîf al propon un repertori acustic cun tocs originâi ma ancje covers internazionâls.

◆ Cun chest spirt, nol podeve mancjâ un progjet che al tegni dongje dute la

sò esperience e storie musicâl. Cussî e je tacade in maniere uficiâl ai 27 di Otubar dal 2021 la distribuzion digjitâl indipendente de produzion musicâl di Louis Armato, cul non memorabil di "Memorabilia".

Un grup selezionât di personis al à ricevût in mût periodic, vie WhatsApp, un file audio mp3 acompagnât di un messaç esplicatif. In dut fin cumò plui di 20 tocs selezionâts tra produzioni vecjis e gnovis, demos e remix.

◆ I doi ultims tocs jessûts tra Jugn e Lui, a sintetizin mai tant ben la varietât musicâl di chest progjet. Il toc che il so video al è za jessût su YouTube, ai 14 di Jugn stât, al è il numar cutuardis e si intitule "Gente di città". Al è un toc cjantautorâl, dulà che Louis Armato al conte di se stes midiant de musiche, ma ancje de sò gjenerazion in cuarante agns di cjançons. Lu fâs cul power trê glemonès de "Louis Armato band", cul bassist Luciano Silei e il baterist Armando Palese.

Metût dongje, rangjât e registrât in cualchi mès, il toc al conte in mût ironic la contrapozizion tra chei che a vivin in citât e chei che a rivin di difûr, tra une superficialitât aparente e un bisugn di rivendicazion, tra vite mondane e une sorevivenza fadiosa, dut cuinçât di snobisim (vèr o presumût) e pregiudizis.

◆ La publicazion numar cuindis e je il toc "Per grazia parzialmente ricevuta". Test di Matteo Bosco (Teo Ho) e musiche di Louis Armato, la cjançon e je stade creade pal disc "Collaborazione ingiustificata" di Teo Ho & Louis Armato e e viôt Teo a la armoniche, Louis ae vòs oltri che aes gharis e al bas, e Matteo Dainese ae baterie, ma ancje al lavôr di remix.

◆ Ducj i tocs a son stâts daspò masterizâts e publicâts ogni mès ancje su Spotify, YouTube, Deezer, Apple Music e altris platformis digjitâls. Al baste cirî "Louis Armato" e o cjatais un grum di buine musiche. Stait daûr al artist e a ducj i siei progjets sui siei canâi sociâi, ma soredut sul sît [www.rocknotes.it](http://www.rocknotes.it). Chest Istât lu cjatais tes miôr sagris, bars, festiva e concerti dal Friûl. ■

**DANUS UNE MAN 5 PAR MIL**

Ancje chest an, **cu la declarazion dai redits** tu puedis dâi une man a *La Patrie dal Friûl*, il mensîl dut in lenghe furlane dal 1946. **Nol coste nuie, basta meti il numar 01299830305 te casele juste:**

**Firme achi**

01299830305

SCELTA DEL DONANTE PER LA DESTINAZIONE DEL CINQUE PER MILLE DELL'IRPEF

SOSTEGNO DEL VOLONTARIATO E DELLE ALTRE ORGANIZZAZIONI NON LUCRATIVE DI UTILITÀ SOCIALE, DELLE ASSOCIAZIONI DI PROMOZIONE SOCIALE E DELLE ASSOCIAZIONI E FONDAZIONI RICONOSCIUTE CHE OPERANO NEI SETTORI DI CUI ALL'ART. 10, C. 1, LETT. A9, DEL D.L.G.S. N. 460 DEL 1997

e firmâ la destinazione dal 5 par mil



**MESTRIS. Par no pierdi la memorie**  
Intervistis a personaçs de culture furlane su chei che a son stâts i lôr riferiments

## «O soi un “Furlan Imperiâl” tal mieç di un mont pluricultural»

**Interviste a Feliciano Medeot, diretôr de Societât Filologjiche  
e grant sostignidôr de particulâr identitât furlane  
dal Friûl di soreli jevât**

Dree Venier

**F**eliciano Medeot, classe 1975, di San Lurinj dal Lusinç, laureât in economie a Udin, chest an al fâs 20 agns tant che diretôr de Societât Filologjiche Furlane. Gjornalist publicist, al è autôr di tancj articui e monografis di caratar storic locâl, di politiche linguistiche, volontariât e tierç setôr. Chest impegn intal cjamp de solidaritât al à vût un ricognossiment impuartant: chest an al è stât elet conseîr nazionâl de FIDAS, la Federazion taliane des associazions dai donadôrs di sanc.

**Feliciano, ce ambient jerial il to país cuant che tu jeris frut? Si fevelavie par furlan? E cumò?**  
Jo in famee e in país o ai simpri fevelât par furlan in maniere naturâl. Tai ultins agns e je cressude tant la mobilitât sociâl, cun tante int che e ven di fûr, sedi forescj che talians, che no lu san o no son usâts a doprâlu, e duncje al è plui dificil che il furlan al sedi la lenghe de comunicazion fra paisans.

**E a scuele cemût jerie la situazion? Âstu mai vude la esperience che ti fos imbroibît fevelâ in lenghe furlane?**  
No ai vude cheste esperience: al jere naturâl che a scuele si fevelâs par talian

vie pes lezioni, ma tai coridôrs si doprave ce che tu vevis voie. No ai memorie di improvizions. Tes scuelis mezanis al jere preside Eraldo Sgubin che i tignive al furlan, e duncje i insegnants a lavin daûr di cheste indicazion. Il nestri professôr di talian nus à fat tantis ativitâts su la lenghe furlane e su storie e culture furlanis. Dut chest prime de leç 482, duncje nuie di strutturât o programât, però in maniere empiriche e je stade une educazion che mi à fat sintî furlan in maniere naturâl.

**E cuant âstu cuistât une cussience plui “politiche”, di furlan tant che popul?**  
Come che o ai dit prime, la mê cussience clamînle “furlaniste” si è svilupade in maniere naturâl vie pai agns e no ai iniment di une



FELICIANO MEDEOT IN "MONTURE MITTELEUROPEANE". TE FOTO PIÇULE, PRE GUIDO MAGHET

iluminazion particulâr. Però mi visi di un episodi sucedût cuant che o jeri frut: al jere vignût in país Feo di Bean par un incuintri e al fevelâ di Europe e di Europe dai popui. E sarâ stade la prime volte che o viodevi la bandiere europeane, e mi à fat pensâ che ancje jessi furlan al jere jessi part di chê unitât.

Altre esperience impuartante, di zovin o ai fat part dal grup folcloristic di Caprive, e zirant la Italie e la Europe - voie o no - tu tacavis a capî di jessi part di un popul diviers di chei altris.

**E cuant âstu disvilupât un pinsir plui strutturât?**

Un incuintri impuartant al è stât vè di professôr, e retôr, Marzi Strassolt, stant che jo o ai fat Economie a Udin. Plui che un mestri, mi à coventât par definî miôr chel che o vevi za dentri cul percors che o vevi fat prime. Un che al diseve robis che a “sunavin” in acuardi cun chel che tu vevis dentri tu.

**E in Filologjiche cemût sèstu rivât?**

Fasint la Universitât dal Friûl, vie Tomadini e je dongje di vie Manin, e duncje o ai tacât a frecuentâ chei bruts puecj (al rît, ndr).

**Ma ce central un economist cun la Filologjiche?**

Pûr fasint studis economics, la pene mi à simpri corut svelte e duncje o ai scrit di storie locâl, che mi apassione. E po dopo o soi durât cussî tant di diretôr de SFF forsît propit pal fat che no soi di formazion umanistiche e duncje al mancje chel che al tire lis riis dal pont di viste pratic, che al fronte cualchi chilo di cjartis di fâ.

**Un mestri par te.**

Tant che “totem”? Dal sigûr Celso Macor! Tai siei scrits tu viodis che al veve une viertidure di cjâf

**Bruno Pizzul e Dino Zoff a son mestris di cemût che si à di jessi oms, doi esemplis.**

straordenarie e tant indevant, che nol pensave ai confins - che tra l'altri in chê volte a jerin plui pençs - ma al fat che o sin ca, in chest teritori, fat di tantis culturis diviersis, ma no in contrapozizion. A

son dutis chestis che nus fasin ce che o sin. Chest al è ce che mi sint jo: mi definis un “furlan imperiâl”,

ven a stâi cun dentri simpri chel esempli che al jere l'Imperi Austro Ongjarês, plurilingâl e pluricultural, un concet che mi plâs tant. Tal Friûl di soreli jevât o vin une mentalitât li che tu ti sintis furlan, ma il plurilinguism nol è un probleme. Mi visi di un funerâl des mès bandis: la messe par talian, la predicje par furlan, il cjant par sloven. Une cerimonie cussî e je l'esempli perfet di ce che o intint.

**E chest sintiment culturâl si tradusial ancje in cualchi mestri politic che par te al è un riferiment?**

Dal sigûr bonsegnôr Luigi Faidutti, che di deputât dal Imperi al cirî simpri di meti adun furlans e slovens. Al rivâ a jessi ancje cjapitani provinciâl di Gurize, in pratiche il president di une provincie autonome.

E cun lui o ricuardi ancje la figure di chel altri deputât furlan a Viene, Giuseppe Bugatto.

**Podaressistu conseânus cualchi leture in lenghe furlane?**

Lis contis di Adelchi Tirelli/Delchi Tirel: storiutis gjoldibilis di Caprive. Ferruccio Tassin cui siei «Robononis un / doi / trê»: libris di anedotiche ma che a pandin un biel sens di apartignince a un Friûl populâr. Po dopo pre Guido

Maghet e Anna Bombig, cu la sô lenghe furlane naif e bucoliche.

**E in cjamp musicâl?**

Mi plasevin i Zuf de Zur, robe di cualchi an fa, e o segnali l'interessant esperiment dai Ensemble D'Anjou. Chest grup di fat al à musicât lis contis di Gianluca Franco, vincidôr dal premi San Simon pe leterature in lenghe furlane. Tacât dome cun cualchi musiche fate pe presentazion dal libri di Franco su Re Ricart in Friûl, al è diventât un spetacul vèr su Ricart in Friûl. E a laran indevant a musicâ altri materiâl dal autôr.

**Par finî, ti vegnial iniment cualchi altri mestri dal “jessi furlans”?**

O fâs il non di doi “furlans di soreli jevât” che no son dal mont leterari, culturâl o politic ma che par me a son mestris di cemût che si à di jessi un om, doi esemplis: Bruno Pizzul e Dino Zoff. Doi furlans che a àn rivât ai nivei plui alts dal lôr lavôr in Italie, ma che no si son mai dismenteâts di jessi prin di dut furlans. Ti conti un fatarel in cont di Dino, che lu rapresente. Intal 1982, daspò di vè “alçât al cîl”, cemût che si dis, la Cope dal mont di balon vinçude in Spagne, un mès dopo lu ai viodût, une di di Lui, a arâ il cjamp a Marian!

**Ultime domande, un autôr o opare che par te al varès di jessi valutât di plui.**

Un autôr che al mertarès di cognossilu di plui al è pre Guido Maghet,

che al aprofondî a nivel culturâl ma ancje eclesiâl la cuistion dai furlans di soreli jevât: jessi furlan ma part di un mont multicultural. Concets ben rapresentâts tal so libri «El scuiarzimi furlan». Po dopo Renato Iacumin tant che storic, politic, poete e come impegn sociâl tant che preside tes scuelis. Un protagonist de riscuiverte des lidris alessandrins aquileiesis dal Friûl, in cubie cul lavôr di Gijlbert Pressac. ■

### FOCUS. Il personaç

**PRE GUIDO MAGHET** (Breçan, 1920 – Breçan, 1991)

Nassût ai 5 di Novembar dal 1920 a Breçan di Cormons (Gurize), al studiâ intal Seminari teologic centrâl di Gurize, dulà che al è stât ordenât predi intal 1944. Laureât in filosofie inte Universitât Gregoriana, al è stât insegnant intes scuelis publichis e in seminari. Al è stât promotôr di azions a pro di une lenghe furlane che e cuistàs dignitât e modernitât, in funzion dal infuartiment di une cussience civil e cristiane. Chest empit si à esprimût in cetancj scrits che a son lâts fûr massime intai agns Otante.

Al è stât promotôr di cors teologjics là che, cu la vuide di docents di varie divignince, a jerin metûts dongje clerics furlans, talians e slovens, in mût di costruî e vivi une civiltât fondade su apuarts diviers. Significatîf al è il so ultin scrit, che al pues jessi definît il so testament spirituâl: «El scuiarzimi furlan». Publicât intal 1989 dome par furlan, al è stât voltât par talian, todesc e sloven. Al proclame cun fermece la sô identitât furlane sul model dal Friûl di soreli jevât e lu dis in cuatri lenghis par fâ savè che jessi furlan a Gurize al vûl di rivocâ intal stes timp dutis lis vòs storichis de zone di Gurize. ■



---

**Par viodi chei altris contignûts  
de “La Patrie dal Friûl”,**

abonaitsi. Dutis lis informazions si cjatin sul sît  
**[www.lapatriedalfriul.org](http://www.lapatriedalfriul.org)**



**Per vedere gli altri contenuti  
de “La Patrie dal Friûl”,**

abbonatevi. Tutte le informazioni si trovano sul sito  
**[www.lapatriedalfriul.org](http://www.lapatriedalfriul.org)**

Che tu sedis za abonât o che tu le vedis lete dome cualchi volte,  
aboniti o rinove l'abonament a un mensîl unic:

**almancul une volte al mês, lei par furlan!**

